

Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaanik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siulittaasoqarfimmut ilaasortat)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeenera

Naalakkersuisut aallaqqaasiullugu aalajangiiffigisassatut siunnersuummut qujapput. Naalakkersuisut Siulittaasoqarfik isumaqatigaat, Inatsisartut oqallinneri innuttaasut malinnaavigisinnaasariaqaraat.

Naalakkersuisut taamaammat erseqqissassavaat, aalajangiiffigisassatut siunnersuummi siunertarineqartut tamaasa Naalakkersuisut tapersersinnaagaat. Naalakkersuisulli tassunga peqatigitillugu isumaqarput siunnersuummi oqaatigineqartut oqaaseqaateqarfigerusuppaat.

Siunnersuummi oqaatigineqartut Inatsisartut ataatsimiinnerisa malinnaaviginissaat periarfissaqareerpoq, Naalakkersuisulli isumaqatigaat aaqqiineq tamanna tamanut pitsaanerpaajunngitsoq. Naalakkersuisut taamaammat aamma isumaqatigaat innuttaasut ataatsimiinnerit tv-kkut kanalimi KNR2-mi malinnaanissaat ajornakusoorsinnaasoq imaluunnit ataatsimiinnerit internetikkut malinnaaviginissaannut aningaasaqarnermi teknikkikkulluunnit periarfissaqanngitsut. Tamassuma kingorna apeqqaaterpoq tamanna qanoq pitsaanerpaamik piviusunngortinneqarsinnaanersoq.

Siunnersuummi siunnersuutigineqarpoq Inatsisartut ataatsimiittarfianni ataatsimiinnerit siumut aalajangersarneqareersumik radiokkut aallakaatitsisarnissaannik KNR pisussaaffilerneqassasoq. Tamassumunnga periutsit marluk Siulittaasoqarfiup oqaatigai. Ilaatigut innuttaanik sullissineq pillugu isumaqatigiissutikkut ilaatigullu inatsisiliornikkut. Siulittaasoqarfiup uparuarpa innuttaasunik sullissineq pillugu isumaqatigiissut atuuttoq aatsaat ulloq 31. decembari 2018 atorunnaassasoq, tamassumalu kingunerissagaa Inatsisartut ataatsimiittarfiannit aallakkaatitsisarnissamik aatsaat 2019-imut innuttaasunik sullissineq pillugu isumaqatigiissummi pisussaaffiliisoqarsinnaassasoq. Tamanna innersuussutigalugu Siulittaasoqarfik inassuteqaateqarpoq tassunga taarsiullugu KNR-ip 2018-ip aallartinneranit taamatut aallakaatitsisarnissamik pisussaaffilerneqarnissaanik kinguneqartussamik inatsimmik allannguisoqassasoq.

Naalakkersuisut tassunga atatillugu malugeqqaat, isumaqatigiissummut atuuttumut ilassutaasinnaasoq pillugu isumaqatigiissuteqarnissamut innuttaasunik sullissineq pillugu isumaqatigiissut nammineq akornutaanngitsoq. Tassunga atatillugu isumaqatigiissummi

ersarissumik allaqqavoq, isumaqatigiissummi allannguutit piffissap isumaqatigiissiorfiusup ingerlanerani illuatungeriinnit isumaqatigiissutigineqarsinnaasut. Immikkorluinnaq pisoqartillugu qaammatinik arfinilinnik siumut nalunaaruteqarluni isumaqatigiissut allanngortinneqarsinnaavoq. Taamaammat Inatsisartut ataatsimiittarfiannit killilereerlugu aalajangikkamik aallakkaatitsisinnaaneq pillugit Naalakkersuisut KNR-illu isumaqatigiissuteqarnissaannut innuttaasunik sullissineq pillugu isumaqatigiissut atuuttoq akornusiinngilaq. Tassunga peqatigitillugu oqaatigineqassaaq, piffissani KNR-ip Inatsisartut ataatsimiittarfiannit aallakkaatitsisarnikuunera siusinnerusukkut innuttaasunik sullissineq pillugu isumaqatigiissutaasarnikuusuni aamma siornatigut ilaasimanngitsoq, tamanna taamaatinneqarpoq ataatsimiittarfimmi piffissat ataatsimiiffiusartut Inatsisartut allanngortimmatigit.

Inatsisartut ataatsimiittarfianni ataatsimiinnernik KNR-ip inatsisitigut aalajangersakkamik aallakkaatitsisarnissamik pisussaaffilerneqarnissaanik siunnersuut eqqarsaatigalugu, inatsisitigut suleriaatsikkullu sinaakkutit KNR-ip ingerlatsineranut atuuttut oqaatigineqareersutut Siulittaasoqarfiup eqqumaffigissavai. KNR pisortat sulisoqarfigivaat nammineertoq, pingaartumillu aallakkaatitsisarnerminut atatillugu Naalakkersuisunut Inatsisartunullu attuumassuteqannginnissaa qulakkeerneqarnikuulluni. Tamassumunnga pissutaavoq sumulluunniit attuumassuteqarani tusagassiorfiunerup mianerineqarnissaa, qitiusumilu oqartussanit akuliuffigineqarani sammisat sammineqarnissaattut nalunaarutigineqartussatullu kissaatigineqartut toqqarneqarsinnaanissaat. Taamaammat KNR aallakkaatitassanik aalajangersimasunik aallakkaatitsisarnissamik inatsisitigut pisussaaffilerneqassappat, KNR-ip aallakkaatitsisarneranut akuliunnerussaaq. Tassunga atatillugu tamassumunnga pissutaasoq tamassumalu KNR-ip tatiginassusianik navianartorsiortitsinaviannginneranik naliliineq tunngaviusumik pingaaruteqanngillat.

Siulittaasoqarfiup siunnersuummi aamma oqaatigaa KNR sillimaniarnermut pingaaruteqartunik nalunaarutini kiisalu inuiaqatigiinnut paasissutissanik innuttaasunut ataatsimut isigalugu soqutigintartunik nalunaarutini aallakkaatitsisarnissamik pisussaaffeqareersaq. Tassunga tapiliullugu oqaatigineqartoq inatsisini aalajangersakkamik pisussaaffeqarneq taanna KNR-ip pisussaaffissaatut uani siunnersuutigineqartumit allaanerungaangitsoq.

Sillimaniarnermi nalunaarutit pillugit aalajangersagaq taamaallaat ajunaarnersuaqartillugu imaluunniit ajornartoortoqartillugu sorsuttoqartilluguluunniit assigisaanullu atorineqartartussaavoq, aallakkaatillu ”OBS-imik aallakkaatitsinertut” taaneqartartut imatut paasineqassapput ”aallakkaatitatut naatsutut” taaneqartartut assersuutigalugu minutsimik ataatsimik sivisussusillit atorlugit aallakkaatitsineq. Taamaalilluni nalunaarutitut assigiinngitsunut marlunnut taakkununnga tunngatillugu aallakkaatitassaviit pineqanngillat. Taamaalilluni radiokkut tv-kkullu aallakkaatitat naatsut KNR-ip nalinginnaasumik aallakkaatittagaanut ilaangillat, taamaammallu aamma pisut pillugit aallakkaatitsisarnermi aalajangersimasunik aallakkaatitsisarnissamik pisussaaffeqarnermut imaaliinnarluni sanilliunneqarsinnaanatik.

Naalakkersuisut aammattaq oqaatigerusuppaat Inatsisartut ataatsimiittarfianni ataatsimiinnernik kissaateqarnerup piviusunngortinnissaanut sumiiffinni radioqarfiit

peqataatinneqarsinnaanerat aamma isumaliutigineqartariaqartoq. Naalakkersuisut tassunga atatillugu inatsisini atuuttuni atugassarititat iluanni aaqquissuussinissaq isumaliutiginikuuaat, tassanilu sumiiffinni radioqarfiit soqutiginnittut sumiiffimmini ataatsimiinnernit isumaqatigiissutit pillugit inatsisit tunngavigalugit aallakaatitsisassallutik.

Siulittaasoqarfimmit oqaatigineqartutut periutsip sorliup atorneqarnera apeqqutaatillugu pisortanut aningaasatigut allaffissornikkullu assigiinngitsunik kinguneqassaaq. Naalakkersuisut tassunga atatillugu ilisimatitsissutigerusuppaat, Inatsisartut ataatsimiittarfianni ataatsimiinnernit aallakaatitsisarnissamik KNR-ip inatsisitigut pisusaaffilerneqarnissaannik siunnersuummi siunertarineqartoq piviusunngortinneqassappat aningaasatigut aamma kinguneqarnissaa ilimagineqarsinnaasoq, tassa KNR taamaattoqassappat assersuutigalugu ussassaarutinit isertitassanik annaasaqariaannaammat. Tamassuma saniatigut innuttaasunik sullissineq pillugu isumaqatigiissummut kinguneqarsinnaavoq, tassa tamanna piffissat aallakaatitsiviusussat isumaqatigiissummi aalajangerneqartut ikinnerulernerannik kinguneqartussaammat. Naggasiullugu aamma eqqumaffigineqassaaq piffissap aallakaatitsiviusussap ilaanik siumut atuisussanngortitsinermi aallakaatitsivigineqarniartutut aalajangersimasunut, pingaartumik inuusuttunut, aallakaatitsinerup samminissaanik KNR-ip periusissiornermi suliaqarneranut aamma kinguneqarsinnaasoq.

Naalakkersuisut isumaqarput, inatsisikkut pisusaaffiliineq atornagu Inatsisartut ataatsimiittarfianni ataatsimiinnernit toqqaannartumik aallakaatitsisarnissamik kissaateqarneq allatigut periarfissaqarnerisooq piaartumik missisorneqarnissaa periarfissaqarnerisooq paasinarsinneqarnissaa naleqquttusoq, tassunga ilanngullugit teknikkikkut aaqqiinerit allat siunnersuummi siunertanik piviusunngortitsinnaasut. Tamassumani aallakaatitsisarnissamik KNR-ip akissussaaffeqarneranut akuliunnissaq sapinngisamik pinngitsoorniarlugu. Taamaaliortoqarsinnaannginnera paasinarsissappat aaqqiissutissat allat soqutiginarsinneqassappat, tassunga ilanngullugu inatsisiliornikkut periarfissaq.

Naalakkersuisut aalajangiiffigisassatut siunnersutip taamatut oqaasertaqarnera tunngavigalugu isumaqatiginngilaat. Naalakkersuisulli tassunga peqatigitillugu inassuteqaateqassappat, siunnersuutip oqallisigineqarneranut atatillugu siunnersuummi taasissutigineqartussap aaqqiissutissanik arlalinnik ammaassisoqarluni allanngortinneqarsinnaanera nalilersorneqassasoq, tamassumalu kingorna siunnersuut Naalakkersuisut isumaqatigisinnaassavaat.